

**Uunga siunnersuut: Inissianik attartortitsisarneq pillugu Inatsisartut peqqussutaata allangortinneqarnera pillugu Inatsisartut inatsisaat nr. xx, xx. xx 2017-imeersoq (Sulisunut inissiamik tigusinissamut ukiunik 7-inik maleruagassaqaqarnermut allangortitsineq)** (Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq)

### **Saqqummiussineq**

(Kommuninut, Nunaqarfinnut, Isorliunerusunut, Attaveqaqatigiinnermut Ineqarnermullu Naalakkersuisoq)

### **Siullermeerneqarnera**

Matumuuna Naalakkersuisut sinnerlugit inissianik attartortitsisarneq pillugu Inatsisartut peqqussutaata allangortinneqarnissaa pillugu siunnersuut saqqummiuppara.

Allannguutissatut siunnersuummut ”*Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersup UPA 2017-mi allangortinneqarnissaa pillugu Naalakkersuisut suliniuteqaqqullugit inatsisartut aalajangiiffigisassaattut siunnersuut. Taamaaliornikkut atorfimmud atatillugu inigisap sivikinnerpaamik ukiuni tallimani attartoreerneratigut attartortup nalinginnaasumik attartukkatut inigilersinnaaqqullugu*”, 2016-imi Inatsisartut akuerisaat tunngavigineqarpoq.

Inissianik attartortitsisarneq pillugu Inatsisartut peqqussutaanni attartortup, ukiuni arfineq marlunni kingullerni sulisunut inissiami najugaqarsimasup sulisunut inissiap maanna najukkami inissiatut attartortittakkatut nalinginnaasutut tiginissaanut periarfissaqartitsisoqarpoq.

Allannguutissatut siunnersuummi matumani sulisunut inissianik attartortut inissianik najukkaminik inissiatut attartortittakkatut nalinginnaasutut sukkanerusumik tiguisinnaalernissaanut periarfissinneqarnissaat, taamaalillutillu sullivimmud allamut nuunnissamut kiffaangissuseqarnerulernissaasa qulakkeerneqarnissaa siunertarinqarpoq. Pingaartumik kommunini aamma Namminersorlutik Oqartussani atorfillit pisortat sulisunut inissiaataannik atuisinnaati-taapput.

Innuttaasut allat, pisortat sulisunut inissiaataannik atuisinnaalerfimminnik atorfininnissamut angusaqarsinnaanngitsut sulisunut inissianut nalinginnaasunut utaqquisut allattorsimaffiannud allatsinnissamud innersuunneqartarput. Piffissaq inissiamik attartortittakkamik nalinginnaasumik pissarsinissamud utaqqiffiusartuq sumiiffimmiit sumiiffimmud allangorartorujussuuvoq.

Allanguutissatut siunnersuutip innuttaasunut allanut, sulisunut inissiamik pissarsinissamut periarfissaqanngitsunut kingunerluuteqarnissaa naatsorsuutigineqanngilaq, ataatsimut isigalugu suli attartortutut nalinginnaasutut allatsinnissaq pilerinarnerusussaammat. Pisut ilaanni inissiamut attartortittakkamut nalinginnaasumut allatsinnissaq sukkanerusumik initaarnissamik kinguneqarsinnaavoq, inissiamik attartortittakkamik tunineqarnissamut piffissaq ataatsimut isigalugu sivikinnerusinnaammat, tassanili illoqarfiit annerit ilaat pineqanngillat.

Taamatut oqaaseqarlunga Naalakkersuisut sinnerlugit immikkoortoq Inatsisartuni suliassanngorlugu tunniuppara.